

# Las Terras subditas Vuclina, Buorm e Clavenna

## Part 1: Organisaziun ed administraziun

■ **Las Trais Lias respectivamain – a partir dal 1524 – la Republica da las Trais Lias han exequi dal 1512–1620 e dal 1639–1797 la suveranità sur la Vuclina ed ils dus contadis da Buorm e Clavenna. Contestada e fin oz betg dal tutfatg sclerida è restada la dumonda, sche bain il Grischun haja recepì ils Vuclinais oriundamain sco subdits u sco alliads (confederads).** La dumonda decisiva è sch'ls Tschintg Artitgels da la dieta da Glion dal 1513, citads savens dals perits da dretg vuclinais (dals quals l'existenza vegn messa en dubi u schizunt negada fin oz da vart grischuna e vuclinaisa), eran vegnids acceptads cuminaivlamain. Als Tschintg Artitgels èn ils Vuclinais sa referids tant en lur revolta dal 1620 cunter l'administraziun manglusa dals Grischuns sco era en lur plants dals onns 1780 e 1790. La realità istorica è dentant ch'els èn vegnids tractads gia sunter il 1515 sco subdits. En il contract da la Pasch perpetua tranter la Frantscha, la Confederaziun e las Lias ha la Frantscha reconuschì il 1516 las conquistas e quel contract ha creà la basa per la Cunvegna ereditara dal 1518, en la quala l'Austria ha medemamain reconuschì quellas conquistas.

### La conquista da la Vuclina, Buorm e Clavenna

Il matg 1512 èn var 12 000 Confederads (svizzers) marschads sut il comando dal barun Ulrich von Hohen sax da Cuir sur il Pass dal Fuorn e via Trent en la Lombardia ed han stgatschà ils Franzos dal ducadi da Milaun. Ils Grischuns èn sa patrunads a questa chaschun da la Vuclina, dals contadis da Clavenna e da Buorm e da las Trais Plaivs sisum il Lai da Com. Las Trais Plaivs èn dentant vegnidas cedidas suenter la Segunda Guerra da Müsch tras il contract da pasch dals 13 da favrer 1532 definitivamain a Milaun. La Vuclina ha survegnì il 1549 ses status valabels per ils tschientaners suandants. Il domini grischun è vegnì interrut tras la sollevaziun dal fanadur 1620 (Murdratsch en Vuclina) e restaurà tras il Capitulat da Milaun dal 1639. La fin d'october 1797 ha Napoleon communitgà als Grischuns l'incorporaziun da la Vuclina e dals contadis en la Republica cisalpina (Lombardia).

### L'organisaziun ed administraziun da las Terras subditas


Avant la conquista tras ils Grischuns il zercladur 1512 sutstavevan la Vuclina ed ils contadis da Buorm e da Clavenna al ducadi da Milaun. Las Lias han lachà l'organisaziun politic-administrativa, cun pitschnas midadas, en ses stadi d'avant il 1512. La communitad era l'unitad da basa giuridica ed organisatorica. Ils districts surcommunalas eran d'ina vart ils dus contadis da Clavenna e da Buorm, da l'autra vart la Vuclina ch'era vegnida subdividida il 1360 en districts giudizials e militars (terzals, talian terziari), numnadamain en in Terzario Inferiore cun las squadras (circuls giudizials) da Murbegn «da questa vart» da l'Adda e Traona «da tschella vart» da l'Adda, en in Terzario di Mezzo che s'estendeva da Chiuro fin a Berbenno e Colorina, cun il lieu principal da Tresivio (a partir dal 1512 da Sunder) sco residenza dal guvernatur e dal vicari e sco lieu da reuniun dal Cussegl da la Val Vuclina ed en in Terzario Superiore che tanscheva da Sondalo fin a Bianzone, cun il lieu principal da Staziona (a partir dal 1512 da Tiraun). La dretgira exempta da Tegl (situada geograficamain en il Terzario Superiore) n'appartegneva a nagin terzal, ella era dentant vegnida attribuida il 1531 cun tut ils dretgs a la Vuclina. Il contadi da Buorm e quel da Clavenna – cun sias unitads administrativas da Clavenna,

da la Val Son Giachen e da Plür – eran dretgiras cumplainamain independentas da la Vuclina. Sunter la ruina da Plür dals 4 da settember 1618 residuava il podestat provisoricamain en il Palazzo Vertemate (spunda dretga da Plür), pli tard a S. Croce. L'assumziun dad obligaziuns surcommunalas (per exempel lavurs stradals, repartiziun dals custs per servetschs militars e d'ulteriuras expensas militaras, fixaziun da taglias, administraziun da la communitad) procurava en mintga district in gremi da represchentants da las communitads (cussegl da contadi, da giurisdicziun, da terzal). Il Cussegl da la Vuclina era cumpetent per tut quai che n'era betg suttemess a l'administraziun grischuna. El sa cumponiva da mintgamai trais represchentants dal Terzario Superiore, da Tegl, da las squadras da Murbegn e da Traona e da mintgamai in exponent da las 19 communitads da la Vuclina. El eleveva in chancelier da la Magnifica Valle che represchentava quella vers il guvernatur grischun e las Lias. Il chancelier da la val vegniva elegi en roda dals districts giudizials per in bienni ed equipà dal guvernatur cun il credenzial. Alura prendeva giu il nov chancelier il sarament dal guvernatur sin ils statuss da la Vuclina. Las communitads elevevan lur agen cussegl communal (talian sindaci) ed il consulent giuridic (talian console di giustizia) per la dretgira bassa (cas d'avugadia, ingiants ed auter pli). Giurists vuclinais sesevan en questas dretgiras sco litinents (talian tenenti) sut il presidi dals uffizians grischuns. Las dretgiras criminalas vuclinaisas subalternas consistivan dad in cussegl da dretgira, in chancelier, ils consulents giuridics ed il scrivant.

Ils uffizis superiors da l'administraziun e da la dretgira eran occupads da Grischuns elegids a la Dieta federala enturn s. Baltramieu (24 d'avust). Sco represchentants da la Republica funzionavan en Vuclina il guvernatur ed in vicari a Sunder, in cumissari ed in duanier (tudestg Zoller) a Clavenna e mintgamai in podestat a Tiraun, Murbegn, Traona, Tegl, Plür e Buorm. Ils cumins da las Trais Lias elevevan en roda in chavalier (talian cavaliere), ils uffizians lur chancelier/scrivant e lur litinent/suppleant.

Il guvernatur represchentava sco uffiziant civil e militar suprem la Republica da las Trais Lias ed era a medem temp podestat dal Terzario di Mezzo (e sco tal derschader d'uffizi a Sunder). El dastgava arrestar (sco guvernatur) delinquentes en l'entira Vuclina. Sustegnì vegniva el da plirs litinents, d'in chavalier e d'ina squadra da sbirs (schulds/policists). Il vicari era il derschader suprem da la Vuclina. A partir dal 1639 vegniva el elegi dals Vuclinais d'ina proposta da trais fatga da la Dieta federala. Il vicari vegniva secundà d'in giurist vuclinais elegi sco assessur dal Cussegl da la Vuclina; senza il consentiment e la preschientscha da quel na dastgava nagina dretgira torturar e senzenziar a mort. Ils podestats eran administraturs e president da la(s) dretgira(s) en lur district respectiv. Tiers vegnivan pensums militars sco era la surveglianza da las administraziuns communalas. Ordaifer lur cumpetenzas steva la pussanza executiva e legislativa ch'era restada sut il domini grischun medemamain tar las communitads.

En il contadi da Buorm, che giudeva grondas libertads, era il podestat grischun mo derschader d'appellaziun cun dretg da graziar e president dal Senat. Cumpetenzas limitadas aveva, en consequenza da dretgs d'autonomia dal contadi e surtut da la citad da Clavenna, era il cumissari (titel dal podestat a Clavenna). La Val S. Giachen,



Charta da las Trais Lias cun lur Terras subditas, dissegnada il 1768 da Gabriel Walser.

ch'ls Grischuns avevan separà dal district giudizial da Clavenna e muni d'ina atgna autorità giudiziala, designava in agen ministerial che possedeve funcziuns executivas e giudizialas. En cas da dretg civil vegniva el sustegnì d'in substitut (talian luogotenente), en cas da dretg penal dal cumissari da Clavenna.

Tranter il 1515/20 e la Refurma dal pajais dal 1603 vegnivan ils uffizians grischuns en las Terras subditas elegids da la Dieta federala, alura è il dretg d'elecziun passà a las dretgiras autas. Sunter che tut ils uffizis eran ids en roda tras las dretgiras autas (e sur quellas tras ils cumins) da las Trais Lias, cumenzava ina nova perioda da roda. La Sindicatura survegliava la rotaziun. Ins vuleva prevegnir qua tras a las nauschas praticas; de facto ha quai però stimulà pir dretg il martgà d'uffizis suenter il 1603. Quest sistem ha pussibilità da stabilir glistas d'assegnaziun d'uffizis sur tschients dad onns e talas èn propi era vegnidas stabilidas. Ellas servivan ad associaziuns d'uffizis da basa per il martgà d'uffizis. Intgins cumins assegnavan l'uffizi (u ils uffizis) che cumpeteva ad els tras la sort tranter ils aspirants e per in pretsch fix u en libra concurrenza da pretschs. Auters elevevan a moda democraticamain correcta ils dignitaris, fixavan dentant ina taxa per l'onur da l'uffizi.

A la fin dal bienni d'uffizi controllava la Sindicatura grischuna l'administraziun, incassava il terz da las entradas tutgantas a la cassa statala da la Republica (la Camera dominicale), tractava sco derschadra plants dals subdits cunter quella e deva cun il benserivit (vul dir bainservi) distgargia als uffizians. Alura vegnivan installads ils uffizians nov elegids.

Ils uffizis en Vuclina eran ina buna basa per far carriera politica en il Grischun e tgi che n'aveva betg pajà smeradain u aveva paucs scrupels sco derschader pudeva vegnir a bainstanza. Perquai eran ils uffizis fitg dumandads e vegnivan pratigads (vul dir cumprads e vendids), conform a la rentabilità presumtiva, a pretschs fitg variabils. En il 18avel tschientaner per exempel pajavan ins per l'uffizi dal guvernatur 12–15 000 fl., per quel dal cumissari 8–10 000, per las podestarias

a Tiraun e Murbegn 5–7000 e per quella a Buorm (mo) 500. La paga ordinaria era modesta e l'uffiziant stueva anc pajar cun quella ses gidanters.

### La fin dal domini grischun

Vers il 1780 è sa manifestada in'opposiziun creschenta en Vuclina ed en ils contadis da Buorm e da Clavenna. Ins era già daditg malcontent là cun l'administraziun grischuna, oravant tut cun il sistem giudizial ch'era, tut tenor il caracter dal derschader, pli u main venal e partischant. Las relaziuns tranter ils patrums grischuns e lur subdits eran sa pegiuradas massivamain a partir dal 1785, cura che Diego Guicciardi è vegnì elegi chancelier da la Vuclina. Quest chau brigliant ha dà contura, unitad e sistem a l'opposiziun en Vuclina ed a partir dal 1788 era a quella a Buorm ed a Clavenna. Dà fiu per propi al strom han ils Grischuns cun lur tractament dals Quindesch Plants vuclinais dal 1787. Ils Patriots, ina gruppa da reformists sut la direcziun da Johann Baptist von Tscharner (\* 1751) e d'opponents politics dals Salis, vulevan eliminar almain ils pli gronds abus. Sco profitaders aristocratici dal sistem politic vertent avevan dentant era els pauc interess da midar quel radicalmain. Ils Quindesch Plants èn vegnids refusads e betg tractads da la Dieta federala ed era l'uschenumnà Project final dal 1792, intermedià da l'Austria e signà dals Grischuns e dals subdits, è svanì senza resultat pratic en il tructet. Ils 19 da zercladur 1797 ha declarà il Cussegl da la Vuclina, suenter avair determinà ils plis, la val sco libra ed independenta, ha tramess als Grischuns ils 21 da zercladur la brev da desdirtga e relaschà ils uffizians grischuns. A la fin d'october 1797 ha Napoleon communitgà a la deputaziun grischuna l'uniun irrevocabla da la Vuclina cun la Republica cisalpina cun ils peds: «Vus vegnis memia tard! Vus essas stads mal cussegliads.»

En ses «Freistaat der III Bünde» remartga Alfred Rufer che «l'administraziun da las Terras subditas resta il fegl il pli stgir en l'istorgia grischuna» ed el discorra d'ina «exploziun senza resguard» e d'in «abus turpegius» da l'administraziun da la giusta. Ins sto percenter constatar che las Terras subditas

possedevan dretgs d'autonomia ordvart vasts e ch'ellas eran participadas fermamain e sin tut ils stgalims a l'administraziun ed a la giurisdicziun. Perquai intimeschan actualmain gist istorichers vuclinais ad ina optica pli differenziada da las relaziuns per liberar – bundant 200 onns suenter la perdita da la Vuclina – l'istorgia cuminaivla dals pregiudizis, da las fixaziuns negativas e da la moda da considerar nundifferenziada.

Adolf Collenberg

### Sindicatura

Gremi da controlla da l'administraziun da las Terras subditas, institui a partir dal 1515. Ils sindicats (per regla trais per Lia) vegnivan proponids en roda dals cumins ed elegids a la Dieta da s. Baltramieu (24 d'avust). La plipart dad els èn stads uffizians en las Terras subditas, e sco tut ils auters mandats uffizials vegniva era quel dal sindicatur «pratitgà» (cumpra d'uffizis). La revisiun administrativa iniziava il mars, a partir dal 1593 l'entschatta da zercladur cun la publicaziun da l'uschenumnà «Grida da la sindicatura» en mintga podestataria tranter Clavenna e Buorm e durava en tut quatter fin sis emnas. La «Grida» cuntregneva las tractandas da la sindicatura ed appellava ils subdits d'inoltrar a quella lur plants e reclamaziuns entaifer trais dis. Sunter la revisiun administrativa vegnivan quels dilucidads da la sindicatura che sa constituiva, sut l'egida da ses president, sco dretgira d'appellaziun. Cun il «benservi» vegniva l'uffiziant dischimegnà e cun l'installaziun formala da ses successur terminava la revisiun.

Adolf Collenberg

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.